

4+9

EPISTOLA PASTORALIS

A D

CLERUM ET POPULUM

CIVITATIS ET DIOECESIS

PISAURENSIS.



ROMÆ MDCCCXXIV.

APUD FRANCISCUM BOURLIE

Superiorum permissu.

(III)
FELIX BEZZIUS

PATRITIUS TOLENTINAS, ET FABRIANENSIS

DEI, ET APOSTOLICAE SEDIS GRATIA

EPISCOPUS PISAURENSIS

**VENERABILIBUS FRATRIBUS, ET DILECTIS FILIIS,
COLLEGIO CANONICORUM, PAROCHIS, CLERICIS, RELIGIOSIS VIRIS,
VIRGINIBUS SACRIS, ORDINIBUS VNIVERSIS
CIVITATIS ET DIOCESEOS.**

*Gratia, Misericordia, et Pax a Deo Patre, et CHRISTO IESU
Domino Nostro.*

Ad Episcopale munus ex Pontificis Summi
LEONIS XII. nutu accitus, maximas sane, atque im-
mortales providentiae Ipsius gratias agendas vi-
deo, quod cum id mihi oneris imponendum duxerit,
istius potius, quam alterius cujusque Ecclesiae procu-
rationem mihi demandarit. Prospexit quippe exigui-
tati meae, Gregem mihi commendans optime ad melio-
ra quaeque comparatum, qui proinde Pastoris aman-
tissimi curis, studiisque apprime respondeat. Multa id-
circo fiducia mihi est apud vos: multa gloriatio pro
vobis, quos vel a primis rei Christianae saeculis san-
ctam fidem edoctos uberrimis adsidue fructibus decoris,
et honestatis abundasse, et vetusta, et recentiora monu-
menta testantur. Commendat quidem laus isthaec quoti-
dianam illorum instantiam, qui vos rexere Antistites in-
confusibiles, ac virtute praestantes, quibus cum me ac-
censeri animadvertam, qui probe video paupertatem
meam, desponderem animo, nisi quae ipsi semina-
runt, me in pulchritudine pacis collecturum fore per-
penderem, et in ipsorum labores ingressus maximam

(IV)

inde impositi oneris partem detractam mihi persentirem . Octavium Zollium heic prae ceteris nominatum volo , qui ad rem sacram in Patria gerendam evocatus tantum apud vos sui desiderium reliquit ex prudentia , pietate , doctrina , gravitate , quibus in exemplum prae-fulgebat , habitus idcirco Parens publicus , Deo dilectus , et hominibus .

Ast haec licet animum mihi , et studium , et consilium addant , non ideo tamen rem plane in tuto esse positam existimo . Cum enim vicaria auctoritate amplissimas Dioeceses , Maceratensem primo , Firmanam deinde annis plus minus viginti administrarim , quibus operam meam quantulamcumque Praesulibus praeclarissimis commodavi , Spinuccio Cardinali , et Minuccio Archiepiscopo , quorum egregia in me merita nulla unquam sinam oblivione deleri : expertus novi , quidnam negotii sit , suscipere salutem populorum , et apud Deum aliena facta , moresque praestare . Quod quidem si perdifficilem semper , et fortissimo cuilibet formidandam gubernationem induxit , nunc profecto ex temporum , quae haud ita pridem nacti sumus , acerbitate , longe gravissimum dignoscitur , mihi vero animi , corporisque viribus destituto plane non ferendum .

Feram tamen levans me supra me , praesentissima Illius ope sustentatus , qui potest et de lapidibus suscitare filios Abrahae , et ea , quae non sunt , vocare , tamquam ea , quae sunt . Feram Pontificis indulgentissimi benig-nitate confirmatus , qui cum fuerit inopinati muneris auctor , erit et in administratione praesidium . Feram demum ex ipsius Gregis natura , qui fuit semper gaudium , decusque Pastorum , mihi quae pariter cumulatam inferet , perennemque jucunditatem .

Hac ego mente ad Vos venio cum fiducia , Charissi-

simi , quos patrio jam affectu complector in CHRISTO
JESU , conglutinatam sentiens animam meam animabus
vestris , pro quarum salute me , curas , fortunamque
omnes integre devovi , quidquid vel auctoritate valeam ,
vel industria , vel viribus , id omne in earum rationes
lubentissime collaturus . Nunciam proinde laetitiae ,
ac dilectionis impensissimae epistolam hanc mitto , id
cumprimis vos monens , ut in charitate radicari , et fun-
dati impleamur invicem communicatione Sancti Spiritus
in omnem plenitudinem Dei .

Conabor id quidem , prout mei muneris ratio po-
stulat , ut Eo bene juvante , qui est redemptio , et justitia ,
possim advenienti Judici , oviumque sanguinem de mani-
bus meis exquirenti reponere fidenter , neminem me
perdidisse ex eis , quos dedit mihi . Ast optatos exitus
haud nanciscuntur mea haec vota , nisi collatis studiis
et vos enitami in id operis contendere , quod porro
unum est , ac necessarium .

Id autem a vobis primum exposco , Venerabiles
Fratres , qui throno pontificali adsidetis in Templo prin-
cipe , et Episcopi presbyterium , coronam , senatum
constituistis . Dulce profecto munus hoc est , Deo psal-
lere , almaeque Sionis aemulos in hymnis , et canticis ju-
stificationes Dei enarrare . Ad id et ego officii honora-
tus in Liberiana Basilica , est quidem , cur sanctam , ac
religionis plenam disciplinam publico commendationis
testimonio commemorem , qua sacra ibidem peragun-
tur . Gratulor , eam et de vestro Ordine laudem invale-
scere , talem nimirum divinis caeremoniis , officiisque
observantiam , assiduitatemque a vobis praestari , ut illu-
stri hoc exemplo non reliqui modo Clerici , sed Popu-
lus quoque ad sacra frequentanda , sancteque colenda
excitentur , atque accendantur . Vestrarum sane est partium

pro loco honoris, quem tenetis, rerum majestatem referre, quibus tractandis estis praepositi, ne in Urbe ob Magistratum splendorem, ob Procerum copiam, ob civium cultum, ob advenarum frequentiam, aliisque ex nominibus florentissima id aliquando vilescat, quod religionis est, et decor ille domus Dei desideretur, quem cum Cassidoro *non pulchritudinem parietum dumtaxat dico, aut Ministrorum pretiosissimos apparatus, sed ipsorum actuum beatissimam qualitatem, quibus cuncta gaudet Ecclesia, scilicet in psalmorum jubilatione, in precum sanctitate, in Christiani Populi devotione* (Cassiodor. in psal. 25.)

Idem et vos moneo, qui in partem sollicitudinum electi estis in regimine animarum, Venerabiles Parochi. Honorem tueri Ecclesiastici ordinis ad vos etiam spectat, quorum mores exemplo sunt fidei Populo, ut inde pudoris, innocentiae, pietatis studio permoveatur. Hinc vero vestram operam ad animae curationem cupientibus praesto adsidue esse vos oportet, ullamque rem vestram huic officio nunquam praevertere. Positi deinde duces in populo, memineritis praecipuam muneris vestri partem recta adolescentum institutione in iis, quae scire Christianum hominem opus est, contineri, ac universi gregis cultura sollicita, qua ad doctrinam sanam imbuatur, et ad illa amplectenda, praestandaque pietatis officia incitetur, quibus salutis nostrae ratio constat, ac praesertim ad frequentem sacramentorum usum, quo tranquillitas animi, et constans in justitiae semitis tenendis voluntas obfirmatur.

Novimus quidem, quae istic pro veritatis catholicae studio communis omnium mens sit, et Domino proinde benedicimus, quod certo sciamus, sapientiam, quae secundum Deum est, non quae secundum elementa mundi,

omnium in cordibus alte defixam regulam esse , ad quam unice oves nostrae actus, sensusque componant . Vestrum ergo est cunctos in ea fide robore cum omni patientia , et doctrina ; qua quidem in re ne desides sitis , rogo vos per viscera Domini nostri JESU CHRISTI , cujus filii per Evangelium geniti traditi sunt vobis custodiendi . Sunt enim, qui et scripto et verbo adversus veritatis sermones insurgunt undique ; et illacrymanda profecto ipsorum audacia est , qui bellum in Christi Ecclesiam infensissimum indixere . Hinc attendite, Fratres, ne intra fines vestros haec pestis misere pervadat ex venenatis illis libris, quos vere libros maledictionis dicimus, et impietatis . Fidei armaturam induite: et si qui fortasse inter oves vestras mollito sermone super oleum fabricatores mendacii subreperint , cultoresve pravorum dogmatum , alique id genus homines nequam , absit, ut humanis distineamini rationibus, quin malorum reparationem quaeratis , eosque arceatis ab Grege .

Hoc pro Religionis incolumitate studium splendeat et in unoquoque vestrum , qui ad sacra operanda adlecti estis , et ad eas praesertim disciplinas perdiscendas operam navate , quibus bonum , rectumque dignoscere , ceterisque ostendere possitis , ne ignorantiae nota inuramini , quae cum in Laicis vix toleranda sit , in Ecclesiasticis viris profecto , quorum labia custodire debent scientiam, nec excusatione digna esse videtur, nec venia . Sancta autem acturi sanctitate vitae praefulgeatis, opus est, ne ministerium vestrum contemnatur ab his, qui foris sunt, habentes malum dicere de vobis . Composito ad religionem animo , ac divino Numine propitiato , ipsoque habitu corporis , actioneque personae portendentes pietatem , procedite ad altare Christi , quasi de

thalamo virgines, ut tructus e divinò sacrificio excipiat uberrimos, et spectantibus, ac divinae rei operam dantibus maximam ejus venerationem injiciatis, eosque ad similem charitatis affectum incitetis.

Haec, quae Sacerdotum sunt, pervolventes animo, de vocatione perpendite, adolescentes Clerici, qui in Seminarii disciplinam traditi estis, aut vestrorum in aedibus immoramini. Summa quidem mihi, et Gregi universo expectatio de vobis est, quos in spem Ecclesiae istius, veluti nova electionis germina, confidimus succrescere in dies magis. Docili propterea, ac miti ingenio, et rerum optimarum cupido vitam, moresque ad salutaria instituta, et ad Clericalia officia sedulo excolite, ut odorem Christi semper deferatis in populum, atque ad Sacerdotium evecti verbo et exemplo praesidium tandem sitis, et oblectamentum Ecclesiae Dei, quae vos sibi suorum charismatum ministros adscivit.

Quid autem vos moneam, qui Religiosis familiis educati, illae estis selectorum militum turmae, quibus Christus Dominus suam communivit Ecclesiam? Imitantes domestica Conditorum exempla, morum innocentiam, integritatem vitae, discessionem a saeculo, tenebitis alacriter susceptum perfectionis iter, arduum quidem, sed divinae charitatis dulcedine conspersum, et sagittas obrundetis parvulorum, qui veluti societati exititalia, vel inutilia saltem improbant vestra instituta, cladesque vobis attulere diuturnas.

Eadem et vestra cogitatio sit, Virgines Deo devotae: ad vestros enim Choros ista me lilia invitant e conclusis hortis fragrantia, in quibus, veluti in foraminibus petrae, habitatis columbae. Deturbatae e collibus thuris, flevistis super flumina Babylonis contritionem filiarum Sion. Audivit vos Sponsus, breviterque pro-

pter electos diebus furoris vos iterum deduxit in arcolas aromatum, ubi nardus, et crocus, myrrha, et aloe cum omnibus primis unguentis. Consolamini itaque, Filiae Sion inclitae, amictae auro primos; plantatae rursus super rivos aquarum, quae veniunt cum impetu e Libano, fructificate, quasi rosa, florete flores, date odorem, et frondete in gratiam, et benedicite Sponsum in operibus suis.

Haec ad personas Deo Sacras. Dilato nunc super vos omnes cor meum, quotquot estis omnium ordinum cives, Filii dilectissimi, ut sanguine immaculati Agni purgati digni inveniamini, quos ubertate domus suae coronet Deus. Ac vos primum compello, Viri Patricii, Decuriones, et qui Magistratum tenetis. *Nullae sunt majores divitiae, nulli honores, nulla hujus major substantia, quam est fides Catholica*: inquit S. Augustinus. Hunc sacratissimum thesaurum fidei religiose custodiat, nullumque laborem, nullum incommodum, nullam sollicitudinem, impensamque formidetis, ubi de avita religione conservanda, augendaque, ac de divino cultu fovendo res sit. Salutem populi, nonnisi ab rei sacrae incolumitate, pendere memineritis, causamque religionis causam publicae felicitatis existimetis. Communibus in id votis, studiisque adlaboremus: sanctos quippe volo vos esse, qui meo estis regimini concrediti: Vos enim universos mea nunc spectat oratio. Aemulemur invicem charismata meliora. Contentiones, simultates, jurgia, offensiones procul ab Dieceseos nostrae finibus arceantur, nec inter eos succrescant, qui legem profitentur, cujus maximum, et primum mandatum charitas est. Festos dies cum primis pie, ac sancte observent omnes, atque frequentes conveniant in templa, ac rite divinis adstant, ut alter alteri mutuo exemplo sit ad colendum, propitiant-

dumque Deum . Aedes sacras , quae domus Dei sunt , summo studio habendas , excolendasque curent singuli , ne ubi criminum est venia postulanda , ibi peccandi datur occasio , aut patrentur audacter peccata . Neque vero multo id sermone inculcandum censeo , cum modestia vestra nota sit omnibus : haud itaque immorabor , ut mulieribus Apostolicum praeceptum commemorem , ut velato propter Angelos capite ecclesias adeant , atque in illis versentur , eoque vestimentorum cultu , qualem mulieres decet promittentes pietatem per opera bona . Rectam demum filiorum institutionem etiam atque etiam commendo : ea quippe contempta familiarum habetur perniciēs , flagitiorum congeries , omnisque ordinis clades , atque dejectio . In fletu , et planctu haec scribo , Charissimi ; filii vestri sunt filii mei , quia sunt filii Ecclesiae : dirigite igitur gressus filiorum vestrorum in semitis Domini .

Haec , Venerabiles Fratres , haec , dilecti Filii , curanda , haec perficienda nobis omnibus sunt . Reliquum nunc est , ut adjuvari a vobis efflagitem orationibus vestris , ut *sarcinam nobiscum ferre Ipse velit , qui si nobiscum non portet , succumbimus* (S. Aug. in Psal. 46.) . Intentas insuper , et adsiduas preces fieri obtestamur ad Patrem totius consolationis , ut LEONEM XII. Pontificem Maximum , et Dominum , Parentemque optimum sospitem diu servet Ecclesiae Catholicae , Romanaeque Rei publicae , quas pro summi Sacerdotii dignitate , ac pro tanti Imperii ratione providentissime , sanctissimeque moderatur . Glorificet ipsum Deus in dies , declinetque super eum , quasi fluvium pacis , et quasi torrentem inundantem gloriam gentium . Prospera denique omnia ab donorum largitore Deo comprecemur Viro non dignitate solum , sed et virtutibus omnis generis eminentissimo PETRO FRANCISCO

GALEFFIO Episcopo Albanensi, qui sanctissimo consecrationis munere hac me die dignatus est.

Quae quidem vota, precesque ut exitus secundissimos assequantur, adsit et Pastori et Gregi MARIA Sancta Virgo Genitrix, ex qua omnis spes vitae, et fructus quilibet justitiae. Haec haec thronus est gratiae, ad quem adeamus cum fiducia: haec stella maris, ad quam respiciamus fidentes, si venti nos tribulationum concutiant: haec Mater pulchrae dilectionis, quam non dimittamus, nisi benedixerit nobis. Propitii adstent et TERENCEUS, et Coelites ceteri Urbis istius, ac Dioeceseos Custodes, Statoresque, ipsique sermonem, vitamque nostram dirigant continuo, et ovile hoc pascant, simulque regant.

Verum finis heic sit Epistolae, quam testem scripsi dispensationis Dei, quae data est mihi in vos, ut impleam verbum Dei, quo firmetur in nobis omnibus CHRISTUS JESUS, cujus in Corde suavissimo fausta, ac felicia omnia vobis adprecor. Deus Pacis aptet vos in omni bono, et Charitas Christi sit cum omnibus vobis.

Datum extra Portam Flaminiam VII. Idus Junii quo die sacram consecrationem accepi. An. Chr. MDCCCXXIV.

IMPRIMATUR

Si videbitur Reverendissimo P. S. P. A. Magistro
J. Patriarch. Constantinopolitanus Vicesgerens.

IMPRIMATUR

Fr. Philippus Anfossi Sac. Palat. Apost. Magister.